

Sias tratgas arranscha il cuschinier cun bien gust e massa fantasia.

Cuschinier plein pissiun e marveglias


«Alpine Inspiration» d'Emanuel Berni da Val S. Pieder ei tut auter ch'in cudisch da cuschinar classic

DA SUSI ROTHMUND / FMR

■ Emanuel Berni da Val S. Pieder ei in cuschinier plein pissiun e marveglias. Il giuven da 23 onns descriva sesez sco specialmein attaschias alla patria e la cuschina alpina ei per el da grond'im-purtonza. Igl onn vargau ha el ediu sez siu emprem cudisch da cuschinar che porta il tetel «Alpine Inspiration». Entschaid'ins a sfegliar en quei cudisch eis ei strusch pusseivel da calar avon ch'ins vegn tiel plaid final digl autur Emanuel Berni. Sco la redactura ein probablamein era auters aunc mai stai aschi tschaffai d'in cudisch da cuschinar cun fotografias

e bunamein nundumbrevilas prespizas, tratgas principalas e desserts. Tut va a prau, era las colurs, ed igl ei arranschau e fotografau cun gust, aschia ch'ils maletgs paran la finfinala propi empau sco art. Per in maletg «selvadi» procura la carn muntaniala cun rollas da sanartugl, crut tgietschen e pralinas da truffels ed era ils raviolis gronds cun jarvas alpinas e garnitura da bulius tschep e «tschaguolas d'aria» ord igl agen iert ein in ver deletg pigl egl. Berni ha dil reminent buca «mo» cuschinau ed arranschau las spisas, mobein era gest fotografau sez quellas. Sco igl amator dalla natira declara ei il fotogra-

far numnadamein siu hobi preferiu. Aschia survegnan ils lecturs da siu cudisch suenter in mument probabel buca mo appetit, mobein era gust da far ina spassegiada en Val S. Pieder. Las sendas da viandar surveschan numnadamein al furber cuschinier sco fil tgietschen che meina tras il cudisch da cuschinar. «Emanuel vul mussar la rihezia dallas Alps ed inspirar amateurs dils plaschers d'empruar ora novas caussas», scriva Claudia Vieli Oertle ella prefaziun. «Jeu hai giu il cletg d'entupar la dretga gliend», di Berni e declara che Vieli Oertle – la dunna che s'occupa cun jarvas – ch'ei portretada el cudisch – seigi segidada cun el da



scrivere i testi pil cudisch.

Creativ e genuin

«La natira ei l'architecta da mias spisas, leutier gioga la stagionalitad d'in product in'impurtonta rolla per mei», declara Berni che descriva sias tratgas sco creativas, genuinas e sin basa dalla cuschina da casa. Ton sco pusseivel drova el products regiunals: carn dil mazler e catschadur dil vitg, litgivas dil pescadur indigen e caschiel d'alp. Sper tratgas magnificas anff'ins era purtrets interessants el cudisch da cuschnar: per exempel dil pur da nuorsas, mazler e catschadur *Marcel Rieder*. Negin enconuschi aschi bein il ciclus, naven dalla naschientscha d'in animal da nez tochen tiel salsiz finiu ni in toc carn, sco igl um da 41 onns. Ils lecturs anflan era la historia dil signun *Martin Capaul*. 50 stads ha igl um da 56 onns gia passentau sillas alps. Pli baul sco paster pign ensemen cun ses geniturs sin l'Alp Stavonas a Sursaissa ed ussa gia dapi 37 onns sco signun sin l'Alp Selva en Val S. Pieder. «Si leu sun jeu en in auter mund», s'entusiasmescha Capaul e para d'haver beinqual caussa communabla cun Berni.

Attaschhaus alla patria

El ei aschi attaschhaus alla patria sco probablamein mo paucs giuven ella Val. Siu mistregn e sia pissiun vul Berni perquei exnum viver ora ella patria. «Miu siemi ei l'avertura d'in agen, pign local – en Val

S. Pieder notabene», tradescha il cuschinier. Ei dueigi denton buca daventar in'ustria sco ins enconuschi normalmein, mobein in local nua ch'il magliar daventi in'aventura cumpleta. Per exempel en cumbinaziun cun ina spassegiada, cun in'occurrenza culturala ni cun ina viseta egl iert dad 80 m² grondezia ch'el cultivescha dapi igl onn vargau. Mo fuss ei per in um giuven ed aschi creativ buca bia pli sempel da far carriera en in marcau svizzer ni schizun egl exterior? «Probablamein bein, carmalar ils hosps en Val S. Pieder ei forsa propi ina sfida», rispunda Berni ed aschunta: «Per mei va ei en emprema lingia denton buca per daventar in cuschinier renomau, mobein oravontut per l'autenticitad ed il genuin!»

Cultura e culinaria

En patratgs cuschina Berni bunamein igl entir di, il crear, inventar e perfecziunar ina tschavera ei da grond'impurtonza per el. Incuntin sappi el denton buca sviluppar novas tschaveras e perquei seigi el leds d'haver ina piazza da cuschinier en ina casa d'attempai. Naturalmein ch'ils habitonts da quella san era profitar da sia creativitad e guder tratgas preparadas cun massa carezia. Ella casa d'attempai ei Berni emploiaus parzialmein ed ha liber las fins d'jamna. In gronda part da siu temps liber nezegia el per ses events da cuschnar ch'el organisescha per tochen 20 persunas. A ses hosps survescha Berni menus da tschun tratgas. Entochen ch'el sa rea-

lisar siu siemi digl agen local fa el il pli bugen ses events enzanua en ina localitad en Val S. Pieder, enqualga era sin in misses a Frunt ni Peil. La fin schaner ha in tal event per exempel liug ella Casa Sentupada dalla claustra a Glion. Leu – tier *Markus Niehaus* – ha il Gualser ambizius numnadamein empriu da cuschinier.


Tip per il cudisch da cuschnar: Emanuel Berni: «Alpine Inspiration», 160 paginas, 75 fotos, 37 francs.

Da retrer tier: www.alpineinspiration.ch

Cultura e culinaria en claustra a Glion

Venderdis, ils 31 da schaner entscheiva allas 19.00 in event da cuschnar ella Casa Sentupada ella claustra a Glion. Ils hosps emprendan d'enconuscher igl art da cuschnar d'Emanuel Berni ed endrieschan el medem mument bia dalla cultura e culinaria alpina. Dalla partida ei quella sera era il versau signun gualser Martin Capaul ch'enrihescha la sera cun caschiel d'alp e la corrispondenta savida.

Reservaziuns ein gjavischadas via mail a: hausderbegegnung@klosterilanz.ch ni per telefon 081 926 95 40. Il prezi per quei event, exclus bubrondas, munta a 68 francs per persuna.



La Quotidiana
7007 Cuir
081/ 255 57 10
<https://www.suedostschweiz.ch/laquoti...>

Medienart: Print
Medientyp: Tages- und Wochenpresse
Auflage: 3'917
Erscheinungsweise: 5x wöchentlich

Seite: 5
Fläche: 78'215 mm²

Auftrag: 3009371
Themen-Nr.: 140.008

Referenz: 76117268
Ausschnitt Seite: 3/3



Il cuschinier da Val S. Pieder, Emanuel Berni, ei fetg attaschaus alla patria nua ch'el se-lai inspirar e di: «La natira ei l'architettura da mias spisas.»